

05 MAY 2002

Wakaf-Ketibaan (Bergambar)

LAGI DELEGASI PERSIDANGAN ISLAM TIBA DI KLIA

SEPANG, 5 Mei (Bernama) -- Sebahagian lagi ketua delegasi dan peserta Persidangan Ketujuh Menteri-menteri Wakaf dan Hal Ehwal Islam tiba di sini hari ini bagi menghadiri persidangan tiga hari itu yang bermula esok.

Menteri Kehakiman, Hal Ehwal Islam dan Wakaf Emiriyah Arab Bersatu Mohamed Nukhaira Al Dhahiri tiba bersama-sama enam anggota delegasi petang ini.

Selain itu, lima anggota delegasi Jordan diketuai Menteri Wakaf dan Hal Ehwal Islam Dr Ahmad Hilayel serta empat anggota delegasi Iran diketuai Timbalan Menteri Kepimpinan Islam dan Ketua Organisasi Wakaf Mohamad Ali Nezamzadeh turut tiba di Lapangan Terbang Antarabangsa KL di sini.

Delegasi lain ialah dari Oman dan Sudan.

Terdahulu, delegasi Yemen diketuai Menteri Wakaf dan Kepimpinan Kassim Ahmad Al-A'gem tiba di KLIA pada 3.15 petang.

Ketibaan mereka disambut Ketua Pengarah Jabatan Kemajuan Islam Malaysia (Jakim) Mohamad Shahir Abdullah.

Sementara itu, Menteri Hal Ehwal Islam, Wakaf, Dakwah dan Kepimpinan Arab Saudi Al Sheikh Saleh Abdul Aziz dijangka tiba pada 11.30 malam.

Menteri Hal Ehwal Ugama Brunei Dr Md Zain Serudin, Menteri Wakaf dan Hal Ehwal Islam Qatar Ahmad bin Abdullah Al-Marri dan Menteri Hal Ehwal Islam dan Wakaf Syria Mohammad Zayadah juga dijadualkan hadir pada persidangan itu.

Persidangan kali ini antara lain akan memberi tumpuan kepada usaha membentuk kerjasama dan penyelarasan dalam urusan wakaf dan hal ehwal Islam.

Sebanyak 250 peserta termasuk 43 menteri dan dua timbalan menteri dari 56 negara Pertubuhan Persidangan Islam (OIC) dan lapan negara lain serta beberapa organisasi dijemput menghadiri persidangan yang julung kali diadakan di negara ini.

Timbalan Perdana Menteri Datuk Seri Abdullah Ahmad Badawi akan merasmikan persidangan itu esok manakala penutupannya akan disempurnakan oleh Menteri Hal Ehwal Islam, Wakaf, Dakwah dan Kepimpinan Arab Saudi Al Sheikh Saleh pada Rabu.

Perdana Menteri Datuk Seri Dr Mahathir Mohamad akan menyampaikan ucap-tama pada Selasa.

Sembilan kertas kerja akan dibentangkan oleh wakil-wakil dari Arab Saudi, Mesir, Maghribi, Malaysia, Kuwait dan Jordan pada persidangan itu.

-- BERNAMA

SNS MAM NAK